


Sari Pustaka

ULASAN BUKU



Adil Rajiah
Why So Serious, Parents? Petaling Jaya: Must Read Sdn. Bhd., 2017.
ISBN 978-967-415-397-7

Menjadi seorang ibu bapa pada zaman moden sungguh mencabar. Ibubapa perlu melengkapkan diri dengan pelbagai ilmu terutama ilmu keibubapaan. Mendidik anak-anak memerlukan kesabaran yang tinggi. Dengan pengaruh pelbagai metodologi khususnya kehadiran teknologi menyebabkan ibu bapa perlu bijak menyeimbangkan keperluan teknologi dengan keperluan sosiologi yang lain.

Penulis menyedari kepentingan perkongsian ilmu pendidikan keibabapaan yang perlu dikongsi olehnya kepada semua. Maka, Buku ini bukan sahaja sesuai kepada mereka yang telah bergelar ibu bapa namun ia juga sesuai bagi mereka yang sudah berkahwin namun masih belum dikurniakan zuriat. Ianya penting sebagai langkah awal persiapan fizikal dan mental.

Buku ini sangat santai bagi ibu bapa yang ingin mencari ilmu keibubapaan pada masa kini. Inti patinya sangat menarik, senang difahami, penuh penceritaan dan menonjolkan

pelbagai situasi pada masa kini yang sering terjadi dalam kalangan ibubapa dan anak-anak. Buku ini turut menampilkan fizikal buku yang berwarna-warni, ringan dan senang untuk dibawa ke mana-mana.

Antara intipati yang menarik untuk dikongsikan ialah isu tentang program televisyen bercorak pendidikan yang didapati tidak membantu perkembangan intelektual anak-anak. Ini kerana anak-anak yang terdedah dengan TV/ video/ *gadget* dalam 2 – 3 jam sehari, akan berisiko mempunyai masalah *emotional management* (bertindak ganas/kemurungan), hubungan yang kurang baik dengan orang lain, kurang keyakinan diri, kemahiran berkomunikasi yang lemah atau lambat bercakap. Sehubungan itu, ibu bapa perlu memastikan mereka berkomunikasi dengan anak-anak dengan lebih kerap dan mempelbagaikan aktiviti bersama-sama dengan anak-anak.

Selain itu, buku ini turut menekankan akan pentingnya hubungan suami isteri yang harmoni. Ini penting kerana ibu bapa menjadi contoh terbaik buat anak-anak. Kehidupan rumah tangga yang aman damai amat diperlukan untuk tumbesaran minda anak-anak. Penulis turut berkongsi beberapa tips untuk memikat hati anak-anak.

Pengulas


Siti Suhana binti Adnan

Penolong Pengarah

Bahagian Pembangunan dan Perpustakaan Desa
Perpustakaan Negara Malaysia

Sari Pustaka

ULASAN BUKU



Rahman Imuda

Mahasiswa Bukan Macai, Pendidikan Bukan Politik

Bandar Baru Bangi, Selangor: Penerbit, Dubook Press Sdn Bhd. 2017.

ISBN 978-967-2108-085

Secara dasarnya buku ini memberikan persepsi penulis yang mewakili golongan mahasiswa yang inginkan keadilan dan keterbukaan dalam pengajian terutamanya berkaitan hal-hal politik. Penerbitan buku ini sesuai dengan masanya kerana, Pilihanraya Umum Ke-14 akan berlangsung dan ia merupakan kali kedua mahasiswa akan menghadapi pilihanraya umum dalam keadaan Akta Universiti Kolej Universiti (AUKU) telah memberi keizinan mahasiswa terlibat secara langsung dengan politik luar kampus.

Keterbukaan penulis dalam perkara ini dapat dilihat apabila beliau mencadangkan agar mahasiswa diberi peluang untuk bertanding di dalam Pilihanraya Umum Ke-14 nanti. Ini disebabkan rasa mual golongan mahasiswa apabila melihat perdebatan antara wakil-wakil rakyat yang berhujah di Parlimen seolah-olah kurang memperjuangkan hak-hak rakyat pada masa kini.

Penulis berpendapat wakil rakyat tidak sepatutnya menjadikan Parlimen seolah-olah seperti pasar malam dengan berhujah tentang isu-isu remeh. Di sesebuah Negara maju penglibatan mahasiswa dalam Parlimen bukanlah sesuatu yang asing dan keberadaan mahasiswa dalam Dewan pastinya akan menjadikan perbahasan lebih dinamik dan menyeluruh terutamanya perkara-perkara yang membabitkan dasar pendidikan dan nasib para belia.

Mungkin hasil karya penulis ini jarang kita dapati dalam industri buku di Malaysia, namun buku yang bertajuk Mahasiswa Bukan Macai, Pendidikan Bukan Politik ini jelas menunjukkan semangat dan aspirasi anak muda dalam memperjuangkan apa yang mereka fikir keadilan untuk rakyat serta kesaksamaan dalam semua perkara. Dari pemerhatian saya, tulisan yang digunakan adalah kecil dan terlalu banyak sub-sub topic di dalam topic utama seperti Mahasiswa, Dasar Pendidikan, Politik dan Agama yang mungkin boleh meneglirukan saya dan ia seolah-olah ditulis oleh dua orang penulis yang berbeza.


Selain itu, pada hemat pengulas pandangan tentang masyarakat Malaysia masih lagi berada dalam zon selesa, terlalu mengikut hawa nafsu, tunduk kepada kata-kata ahli politik, terlalu leka sehingga pelbagai usaha yang dijalankan oleh pihak pro pembangkang untuk membawa perubahan dipandang hina merupakan pandangan peribadi penulis yang boleh diperdebatkan.

Kesimpulannya, buku ini sesuai untuk dibaca oleh golongan pemikir terutamanya ahli politik dan pemerhati dunia politik negara kerana ia sarat dengan mesej dan lontaran idea dan aspirasi penulis yang mewakili golongan muda yang mahukan jaminan masa depan mereka dan Negara kita berada dilandasan yang tepat untuk menjadi sebuah Negara maju yang tidak meminggirkan nilai budaya dan sosia ekonomi semua lapisan masyarakat

Pengulas:

Sahril Lariwo
Penolong Pengarah
Bahagian Gerakan Literasi Maklumat
Perpustakaan Negara Malaysia

ULASAN BUKU



Kassim Ahmad
Autobiografi Seorang Pemberontak
Kuala Lumpur: Yayasan Budi, 2017.
ISBN 978-983-4389-239

Seorang yang sesat dan menyeleweng dari aliran Ahli Sunnah Wal-Jama'ah , anti hadis dan anti Imam Shafie r.a, itu antara watak yang dilukis massa kepada seorang tokoh yang kontroversi dan - Kassim Ahmad. Sehinggakan Tan Sri Rais Yatim, dalam satu pertemuan berkata kepada beliau “teruskan berontak!”. Mengapakah dia berontak? Latarbelakang hidupnya yang dilahir dan besarkan dalam 4 era sejarah negara iaitu era penjajahan British, penjajahan Jepun, pra kemerdekaan Tanah Melayu dan pasca kemerdekaan negara, telah membentuk personaliti beliau sebagaimana yang dikenali.

Buku ini mengupas dengan terperinci tindakan dan pemikiran beliau yang dianggap suka memberontak berserta alasan-alasan kenapa beliau bertindak sedemikian. Melalui Autobiografi Seorang Pemberontak ini sedikit sebanyak, kita dapat mengenali watak dan perwatakan sebenar tokoh yang penuh kontroversi ini. Bagi mengelakkan kekeliruan, pembaca dinasihatkan merujuk kepada pakar terutama bab yang berkaitan dengan akidah seorang Islam. Bagi memudahkan pembaca, secara amnya autobiografi ini terbahagi kepada 44 bab, dalam 6 bahagian.

Antara yang menarik adalah pandangan tokoh terhadap hadis/ sunnah, kritikan terhadap Iman Shafi'e r.a, kritikan terhadap Ahli Sunnah Wal Jama'ah dan pandangan beliau terhadap kalimah sahadah kedua. Selain itu, Kassim Ahmad yang menerima pelbagai reaksi daripada golongan ulama ialah kenyataan beliau terhadap Hadis/ Sunnah adalah ajaran Nabi Muhammad yang sebagaimana ketetapan Allah melalui Al Quran, tidak berkembang seperti yang sepatutnya. Menurut beliau, setelah 300 tahun kewafatan Nabi Muhammad, ajaran Islam yang asalnya hanya menjadikan Al Quran sumber rujukan dan panduan telah berpecah kepada dua dengan kewujudan hadis/ sunnah. Kassim Ahmad berpendapat, pemahaman umat Islam kini, bahawa hadis itu berperanan untuk memperjelaskan maksud sesuatu perintah Allah melalui ayat Al Quran, pemahaman tersebut adalah terbatal, kerana Al Quran itu terhasil dari pegetahuan atau ilmu Allah, manakala hadis pula terhasil dari akal manusia.

Menurut fahaman beliau, Hadis/ sunnah ini juga merupakan alat oleh musuh Islam untuk mengalihkan peranan Al Quran dalam kehidupan Muslim. Sebagai contoh, hukum bunuh kepada individu Muslim yang murtad, adalah diambil dari kitab Taurat yang diturunkan kepada Bani Israel melalui Nabi Musa a.s.. Beliau turut mendakwa kewujudan hadis/ sunnah telah menyebabkan umat Islam terbahagi dua iaitu Sunni dan Syiah. Pandangan Kassim Ahmad ini telah diterbitkan dalam buku yang berjudul *Hadith – Satu Penilaian Semula* tahun 1986

Kesimpulannya, buku ini hanya sesuai untuk bacaan golongan dewasa, namun masih memerlukan rujukan pakar terutama dalam hal yang berkaitan akidah, hadis dan syahadah. Penulis telah cuba sebaik mungkin untuk mengupas sesuatu isu dengan menggunakan kaedah serta contoh yang mudah difahami oleh pembaca. Buku ini juga menggunakan gaya bahasa yang mudah agar pembaca tidak bosan dan dapat memahami perkara yang ingin diketengahkan oleh penulis dengan lebih mudah dan berkesan.

Penulis juga menggunakan bab-bab bagi membezakan dan membincangkan sesuatu isu. Ini bagi memberi penekanan kepada perkara atau isu-isu supaya dapat difahami oleh pembaca dengan mudah dan ianya turut disertakan dengan ilustrasi yang jelas maksudnya. Oleh itu, tidak rugi untuk pembaca untuk mengenali tokoh yang penuh kontroversi ini.

Pengulas:


Mohamad Taufiq bin Hamdan

Penolong Pengarah

Bahagian Pembangunan Dan Perpustakaan Desa
Perpustakaan Negara Malaysia

Sari Pustaka

ULASAN BUKU



Dr. Ainatul Asyila, Dr. Hezry Haizad, Dr. Athirah Azhar, Dr. Zulaikha Zawawi, Dr. Arifah Zin, Dr. Robinn Teoh & Dr. Siew Sies Cheah
V for Veterinar
Kuala Terengganu, Terengganu: Penerbitan Kata Pilar,
2017
ISBN 978-967201-415-7

Buku ini mengandungi cerita menarik kisah dan pengalaman dari tujuh orang doktor veterinar. Buku ini menceritakan sisi-sisi kehidupan seorang doktor veterinar bergenre non fiksyen, mudah dan santai sesuai untuk semua lapisan masyarakat. Kisah mereka dibukukan dengan garapan yang cukup ringkas dan menarik melalui pembahagian tujuh bab.

Melalui buku ini pelbagai fakta dan ilmu veterinar dikongsi oleh setiap doktor. Kisah kehidupan seorang doktor haiwan dirungkai dengan penuh dramatik melalui garapan bahasa yang sangat mudah difahami dan dekat dengan pembaca. Antara fakta menarik yang boleh dikongsi adalah mengenai kuda laut yang boleh menerima anugerah bapa mithali kerana kuda laut jantan menerima benih (telur) daripada kuda laut betina lalu mengandung dan melahirkan anak-anak mereka. Inilah yang dinamakan berat sama dipikul ringan sama dijinjing.

Menariknya tentang buku ini adalah penceritaan dan perkongsian tips-tips penjagaan

haiwan kesayangan seperti kucing, iguana, labi-labi, kura-kura, kucing dan lain-lain. Ia adalah secebis ilmu yang dipinjamkan oleh Allah SWT kepada mereka dan dikongsikan semula kepada semua peminat-peminat haiwan. Antara tips penjagaan kura-kura yang terkesan adalah pentingnya menjaga mata kura-kura kerana haiwan ini menggunakan deria mata dan bau untuk mencari makanan. Kerosakan salah satu deria akan menyebabkan kura-kura kurang makan dan akhirnya jatuh sakit. Oleh itu, amat penting bagi kura-kura separa akuatik dijaga kualiti airnya untuk mengelakkan kuman yang menjangkiti air yang akan merosakkan deria bau dan mata kura-kura.

Menyelak bab demi bab buku ini, sememangnya banyak pengalaman dan pandangan masyarakat mengenai kerjaya sebagai doktor haiwan. Apa tanggapan masyarakat mengenai keperluan doktor Islam yang perlu melihat dan melawat kandang ternakan babi. Bagaimana mereka sebagai doktor perlu menangani dan menjawab isu-isu ini. Selain itu, penulis turut berkongsi bibit-bibit percintaan seorang doktor haiwan, kisah bagaimana pengalaman mereka mengendali haiwan dan pemilik haiwan dan sebagainya. Antara yang menarik adalah bagaimana seorang pemilik haiwan


Buku ini sesuai untuk adik-adik yang masih dibangku sekolah, matrikulasi, asasi sebagai pendedahan untuk memilih program pengajian di universiti kelak dan mereka yang masih tercari-cari kerjaya yang diminati. Setelah membaca buku ini adik-adik boleh menilai sendiri mengenai kerjaya sebagai seorang doktor veterinar.

Pengulas:

Jamiliana Bt Jamil
Penolong Pengarah
Pusat Penyerahan Terbitan Negara
Perpustakaan Negara Malaysia

Sari Pustaka

ULASAN BUKU



Zulkifli Hasan

Masa Depan Strategik Kebangkitan Islam

Kuala Lumpur: Angkatan Belia Islam Malaysia,
2017.

ISBN 978-967-11782-87

Secara umumnya buku ini terbahagi kepada dua bahagian iaitu Bahagian Pertama adalah artikel dalam Bahasa Melayu dan Bahagian Kedua adalah artikel dalam Bahasa Inggeris. Bahagian Pertama merupakan kompilasi enam makalah yang dibentangkan semasa Seminar Kebangkitan Islam Jilid ii 2016 kecuali sebuah artikel bertajuk *In Defence of Guided Reason: Hamka and the Reconstruction of South East Asian*, satu-satunya makalah dalam Bahasa Inggeris dalam seminar ini dimasukkan dalam Bahagian Kedua.

Bahagian Kedua buku ini menampilkan kesemua makalah dalam bahasa Inggeris yang dibentangkan semasa *World Conference on Islamic Resurgence* 2013. Kesemua makalah disusun mengikut tema dan gagasan utama buku ini iaitu *Masa Depan Strategik Kebangkitan Islam*. Bagi memastikan keseluruhan idea dapat dihayati dan difahami dengan baik dan jelas, maka kesemua makalah ini perlu dibaca secara menyeluruh dan tidak berasingan.

Antara artikel menarik yang boleh dikongsi oleh pengulas adalah dari artikel ke 2 dan ke 4. Dalam Artikel ke 2 bertajuk *Islam di Malaysia: Sorotan Sejarah dan Masa Depan* yang dinukilkan oleh Yang Berhormat Senator Dato' Dr. Muhammad Nur Manutu mengimbau dan mengupas sejarah kebangkitan Islam di Malaysia. Penulis melalui artikel ini telah mengimbau usaha-usaha awal kebangkitan Islam di Malaysia termasuk pemartaban syariat dan program bina insan. Penulis kemudiannya telah membicarakan tentang masa depan kebangkitan Islam di Malaysia dengan beberapa idea dan gagasan yang beras.

Selain itu, Artikel ke-4 bertajuk *Kebangkitan Generasi Baru: Realiti dan Prospek Masa Depan* ditulis oleh *Prospek Masa Depan* ditulis oleh Profesor Madya Dr. Zulkifli Hasan, ahli akademik muda yang aktif dengan gerakan dakwah, keilmuan dan keintelektualan di peringkat nasional dan antarabangsa. Penulis telah membuat analisis keadaan sosioekonomi dan politik umat Islam yang sangat penting untuk dijadikan asas kepada perancangan masa depan. Penulis kemudiannya telah menggariskan beberapa aspek penting bagi memastikan kelestarian kebangkitan Islam dengan “wisdom” atau hikmah yang bakal menjadi penentu. Artikel yang sarat dengan idea dan gagasan segar ini adalah antara makalah yang perlu diteliti secara mendalam oleh pembaca.

Bahagian Kedua buku ini dimulakan dengan artikel yang sangat signifikan dan mestilah dibaca oleh semua bertajuk *Establishing the Institutions of Governance for Justice, Democracy and Human Rights*. Makalah ini merupakan ucaptama World Conference on Islamic Resurgence 2013. Ucaptama ini menyentuh aspek tadbir urus, keadilan, demokrasi dan hak asasi manusia.

Antara intipati yang terbaik dalam bahagian ini hasil garapan oleh John Funston, seorang sarjana politik Islam di Asia Tenggara. Penulis secara kritis telah menelusuri sejarah kebangkitan politikal Islam di Malaysia dengan menganalisis perkembangan bermula Kaum Muda sehingga era Reformasi. Beliau turut melihat bagaimana PAS dan UMNO yang telah melalui proses radikalasi dan implikasinya dalam politik di Malaysia. Rumusan beliau bahawa peranan dan fungsi badan bukan kerajaan seperti ABIM yang memberikan sumbangan signifikan kepada perubahan sosial masyarakat.


Artikel-artikel yang terdapat dalam buku ini boleh dijadikan asas dan panduan umum kepada gerakan Islam, Institusi, ahli akademik, pembuat dan pelaksana dasar, dan masyarakat umum bagi merencanakan projek menggembung usaha dan tenaga ke arah mengembalikan kegemilangan Islam yang menerima semakin banyak cabaran dalam pelbagai bentuk pada masa kini.

Pengulas:

Zaiton Binti Hassan

Penolong Pengarah
Bahagian Gerakan Literasi Maklumat
Perpustakaan Negara Malaysia

ULASAN BUKU



Khairul Abdullah
Mentaliti Jamban
Kuala Lumpur: Komrad Buku, 2017.
ISBN 978-967-13700-49

Buku ini mengandungi 31 bab yang menceritakan pengalaman dan pandangan penulis terhadap sikap dan mentality segerintir masyarakat Malaysia jika dibandingkan dengan masyarakat di negara-negara maju khususnya di Eropah. Penulis adalah seorang pereka grafik dan laman web yang pernah bekerja dan menetap di Jerman dan selalu mengembara ke serata dunia.

Melalui buku ini penulis merungkaikan sikap dan mentality segerintir (atau lebih tepat kebanyakan) masyarakat Malaysia yang masih berada pada tahap tidak sewajarnya walaupun Negara telah jauh maju ke hadapan. Sebagai contoh sampah masih bertaburan, tandas awam masih kotor, memandu di lorong kecemasan tanpa sebab yang sepatutnya, melanggar lampu isyarat dan banyak lagi. Perkara ini jauh berbeza dengan di negara-negara maju- apakah puncanya? Jawapannya adalah mentaliti.

Menariknya tentang buku ini adalah penceritaan dan perbandingan sikap, budaya dan mentality masyarakat kita yang masih ‘kurang maju’ dalam beberapa perkara. Kemudahan yang terdapat di Negara kita sudah boleh dikatakan setanding dengan negara-negara maju tetapi sikap dan mentaliti kita dalam sesetengah perkara masih jauh di belakang. Meskipun kita telah diajar sejak di peringkat sekolah rendah lagi namun kerana budaya dan mentaliti kita maka ‘mentaliti maju’ yang diajar itu akhirnya hilang begitu sahaja kerana ‘kebiasaan’ dalam budaya dan cara hidup kita.

Menyalak bab demi bab buku ini, sememangnya banyak perkara dan sindiran sinis yang diajukan penulis yang wajar kita ambil perhatian dan memulakan perubahan bermula dari diri kita sendiri. Sememangnya perkara-perkara tersebut kita lakukan dan lalui saban hari. Sebagai contoh, pernahkah kita memotong barisan semasa membayar tol dan menukar lorong ketika memandu tanpa memberikan lampu isyarat terlebih dahulu? Jika alasan kita hendak cepat, maka orang lain juga semuanya hendak cepat. Pernahkah kita terfikir keselamatan diri sendiri kalau pun tidak memikirkan keselamatan orang lain. Jadi, janganlah terlalu *selfish!*.

Berjalan-jalan di taman rekreasi atau di tepi jalan, kita akan temui sampah yang dibuang bukan di dalam tong sampah atau di tempat sepatutnya atau lebih teruk lagi sampah dibuang keluar dari kereta. Alasan yang diberikan, ‘*tak apa....nantikan ada pekerja yang akan buat semua kerja ni*’. Betapa dangkalnya pemikiran sebahagian masyarakat kita. Asalkan tempat kita bersih, biarlah tempat orang lain. Sedangkan dari kecil kita telah diajar kebersihan adalah sebahagian daripada iman.

Bertukar ke media sosial pula kita boleh membaca sendiri bagaimana ‘berbudi bahasanya’ sebahagian masyarakat kita menggunakan media social baik Facebook, Instagram, Twitter dan sebagainya. Paling banyak sumpah seranah, komen yang tidak ada hujung pangkal, terlalu beremosi, komen tiada kaitan dengan isu, komen yang menampakkan kebodohan diri dan tidak difahami kerana terlalu banyak singkatan dan bahasa ‘hipster’.

Kita lihat pula bagaimana masyarakat kita menggunakan kemudahan awam yang disediakan. Amat jarang sekali kita jumpa ada tandas awam yang sentiasa bersih, kering

dan tidak berbau yang tidak menyenangkan kecuali tandas awam di hentian rehat dan rawat dan di pusat membeli belah. Sama ada tandas berbau hancing, tisu tandas bertaburan di sana sini, *flush* tidak boleh digunakan kerana rosak sampailah sehingga yang ada sesuka hati membuang tuala wanita ke dalam mangkuk tandas. Seperti mana kita mahukan keselesaan menggunakan tandas awam ini, begitulah juga dengan orang lain.

Yang terakhir menarik perhatian saya adalah berkaitan budi bahasa. Tidak salah rasanya jika kita membudayakan amalan berterima kasih kepada orang lain, bermanis muka dan menyebarkan salam. Bukankah itu semua adalah ajaran agama kita? Amat menyediakan masih ada antara kita yang bertugas di kaunter perkhidmatan baik sebagai juruwang, pegawai khidmat pelanggan mahu pun penjaga kaunter tambah nilai kad touch n go bermasam muka memberikan layanan. Tidak salah rasanya jika berterima kasih dan memberikan layanan dengan senyuman. Pelanggan yang datang adalah pembawa rezeki untuk kita bukannya peminta sedekah yang meminta ehsan daripada kita.


Bacalah buku ini dengan minda dan hati yang terbuka. Sekiranya kita merasa terkena dengan sindiran buku ini, fikir fikirkanlah dengan kewarasan dan kematangan. Lakukan perubahan bermula dengan diri kita!

Pengulas:

Mohammad Rizal Bin Abdullah
Timbalan Pengarah
Bahagian Khidmat Pengurusan dan Sumber Manusia
Perpustakaan Negara Malaysia

Sari Pustaka

ULASAN BUKU



Mohd Fathuallah
96 Kod Rahsia Bagaimana Untuk Berjaya
Seri Kembangan, Selangor: True Wealth Sdn Bhd.,
2017.
ISBN 9978-967-416-0371-1

Gagal mencuba terlebih dahulu adalah jauh lebih mulia daripada gagal untuk mencuba" Ini ungkapan bestari dari buku 96 Kod Rahsia Bagaimana Untuk Berjaya oleh penulis hebat Mohd Fathuallah atau lebih dikenali sebagai Fath.

Mohd Fathuallah merupakan pemegang Ijazah Sarjana Muda Perakaunan dari Universiti Teknologi Mara. Beliau merupakan ahli perniagaan dalam bidang hartanah dan mempunyai syarikat sendiri iaitu FATH GROUP. Beliau turut bergerak secara aktif dalam member ceramah, seminar dan juga sebagai penceramah jemputan serta bergelar hartawan pada usia seawal 25 tahun.

Sebagai seorang yang cintakan ilmu pengetahuan, beliau mengadaptasi kehebatan di bidang perniagaan kedunia penulisan dengan satu harapan agar lebih ramai usahawan terbilang dapat dilahirkan.

Buku 96 Kod Rahsia Bagaimana Untuk Berjaya ditulis khusus untuk mereka yang sentiasa berani mencuba sesuatu yang baru berkonsepkan “di luar kotak” serta sentiasa memikirkan cara untuk memajukan diri dalam apa jua bidang yang diceburi. Keutamaannya adalah mereka yang “berani untuk gagal” kerana seperti kata bestari J.K Rowling (yang turut dikongsikan di dalam buku ini) – “Kegagalan adalah asas keutamaan kejayaan”.

Penulis membahagikan topik kepada 8 bahagian utama bermula dari aspek motivasi kepada peluang dalam perniagaan, hartanah, kehidupan, kebajikan, jualan, hubungan dan pelajaran.

Setiap persoalan dibangkit dan dikupas dengan cemerlang menggunakagaya bahasa yang mudah untuk difahami oleh pembaca. Perkara menarik yang dibincangkan termasuklah bagaimana untuk membina impian yang hebat dan mencapainya, bagaimana untuk menghasilkan jenama yang disegani, bagaimana untuk melihat peluang dan menggunakan serta bagaimana untuk berjaya dalam perniagaan walaupun tanpa modal. Ironinya, untuk berjaya kita perlu sentiasa berfikir dan melaksanakannya dengan kreatif dan inovatif.

Wujudkah jalan pintas untuk kita semua berjaya? Bolehkah kita berjaya tanpa mentor? siapakah yang perlu kita bantu untuk lebih berjaya?. Semua ini akan pembaca temui jawapannya apabila membaca karya setebal 257 muka surat ini seperti ungkapan “kita semua layak untuk berjaya, untuk itu kita perlu berketrampilan hebat setiap masa”-Oprah Winfrey.

Bagi menguatkan intipati karya, penulis menyelitkan kata-kata peransang inspirasi kehidupan insan hebat seperti tokoh bilionair terkemuka dunia, cendekiawan yang disegani dan personaliti yang berjaya. Antaranya ialah Mark Zuckerberg, J.K Rowling, Steve Ballmer, Reid Hoffman, Steve Jobs, Bill Gates, Oprah Winfrey dan ramai lagi.Tips menarik dari penulis, apabila berjumpa dengan insan hebat, tanyalah “apakah faktor yang menjadikan mereka nekad dalam dunia perniagaan dan rahsia yang diamalkan untukkekalkan momentum kejayaan ke tahap yang tertinggi”.

Kesimpulannya, buku 96 kod rahsia bagaimana untuk Berjaya yang didedahkan oleh penulis amat sesuai bagi membantu anda untuk mencapai kejayaan dalam apa jua bidang yang diminati dan pastinya rahsia-rahsia di dalamnya adalah satu pelaburan yang amat bernilai serta akan membawa hasil yang tiada penghujungnya. Namun, peringatan dari kod yang ke 96 amat penting dan perlu sentiasa diingati iaitu “jangan cuba menjadi orang yang terlalu pandai”-*Michael Dell*.Jom baca!!


Pengulas:

Zuliana Ab. Rashid

Penolong Pengarah
Bahagian Gerakan Literasi Maklumat
Perpustakaan Negara Malaysia

Sari Pustaka

SINOPSIS BUKU




NORADILAH MOHD
SAPIE
**Kembara Berbasikal
Suami Isteri Dari Kuala
Lumpur-Mekah**
Batu Caves, Selangor:
KHM Adventure, 2017.
51ms.
ISBN 978-967-15328

Sebuah coretan berdasarkan pengalaman sebenar pengembalaan sepasang suami isteri yang berbasikal dari Kuala Lumpur ke Mekah. Pengembalaan mereka berjaya merentasi 14 buah negara merangkumi Malaysia, Thailand, Myanmar, India, Nepal, Pakistan, China, Kyrgyzstan, Uzbekistan, Afghanistan, Iran, UAE dan diakhiri dengan Arab Saudi. Sepanjang pengembalaan mereka mengambil peluang mengenali masyarakat tempatan untuk saling berkongsi cerita tentang adat dan budaya setempat. Banyak peristiwa pahit manis sepanjang pengembalaan dikongsikan untuk tatapan dan renungan para pembaca untuk mentafsirkannya. Pengembalaan selama 15 bulan ke 14 buah negara ini telah membuka mata dan minda mereka untuk menjadi orang yang lebih baik dan dapat memberi manfaat kepada segenap lapisan masyarakat. Bak kata penulis "*kehidupan ini adalah suatu pengembalaan dari alam maya menuju ke alam hakiki*".

Sari Pustaka


SINOPSIS BUKU



AYZA GURSOY
What's Up Turks?
Batu Caves, Selangor:
Must Read Sdn. Bhd,
2017. 208ms.
ISBN 978-967-2038-33-7

Merupakan catatan realiti hidup penulis sebagai pemastautin di negara Turki yang jauh terpencil dari komuniti Melayu sepanjang tujuh tahun menetap di negara itu. Proses menyesuaikan diri di bumi asing terpaksa dilalui oleh penulis termasuk memahami tingkah laku dalam kehidupan sehari-hari masyarakat Turki yang terkenal dengan sikap cakap lepas mereka. Penulis menekankan supaya bijak menyesuaikan diri dan menghormati adat serta budaya masyarakat setempat. Ini amat penting untuk membentuk keharmonian antara budaya dan bangsa yang berbeza, malahan akan mengundang rasa hormat antara satu sama lain. Fikiran mesti terbuka serta harus cekal dalam meraikan perbezaan dan melihat dari perspektif yang positif. Juga dikongsikan resepi masakan tradisi Turki, panduan untuk menjalani kehidupan, panduan sekiranya ingin melawat Turki dan panduan ringkas untuk berbahasa Turki. Pesanan penulis, "*di mana bumi dipijak, di situ langit dijunjung*".


SINOPSIS BUKU



LU PEI CHUN
Zaman Jepun di Malaysia
Kuala Lumpur: Penerbit Pusat Bahasa Aman, 2017. 168ms.
ISBN 978-983-097-658-7

Buku edisi terjemahan bahasa Melayu ini asalnya adalah dari edisi bahasa Jepun dan bahasa Cina. Merangkumi 16 bab yang berkaitan tentang pencerobohan, kekejaman, pembunuhan dan perbuatan jenayah perang yang dilakukan oleh tentera Jepun semasa berada di Tanah Melayu. Penjajahan Jepun selama 8 bulan ke atas Tanah Melayu bermula di Kota Bahru. Ekonomi negara merosot teruk semasa Jepun menjajah sehingga harga barang melambung tinggi dan kadar pengangguran meningkat. Mata wang Jepun "pokok pisang" diperkenalkan namun seperti tiada nilai kerana dicetak tanpa kawalan dan menyebabkan kadar inflasi meningkat dengan mendadak. Rakyat hidup diselubungi ketakutan dan menderita disebabkan sifat kejam oleh tentera Jepun. Jelas sekali kesengsaraan yang pernah dilalui terdahulu, wajarlah dihargai keamanan dan kemakmuran yang dikecapi kita pada hari ini.

SINOPSIS BUKU




**MAT ROFA ISMAIL
BICARAWARA SAINS
ISLAM**

Shah Alam, Selangor:
Grup Buku Karangkraf
Sdn. Bhd, 2016. 826ms.
ISBN 978-967-86-0720-9

Buku ini memaparkan sejarah, falsafah dan perbincangan sains tamadun Islam yang dikembangkan menerusi paradigma yang bersepadau antara aspek naqli dan aqli, aman dan amal serta kualitatif dan kuantitatif. Sumbangan agung terhadap umat oleh ilmuwan Islam terdahulu dalam bidang arkeologi, botani, zoologi, mantik, pertanian, pelayaran, matematik, falak, kosmologi, geologi, fizik, kimia, pendidikan, perubatan dan ketamadunan telah memberi impak yang besar terhadap peradaban dan pemikiran umat dalam kerangka kesatuan ilmu yang padu. Tradisi ilmu ini bersinar gemilang dalam sejarah peradaban umat dan menyelusuri ke seluruh pelosok alam melalui warisan ilmu dari generasi ke generasi. Wajar bagi pembaca untuk merenungi sejarah kisah silam yang disampaikan sebagai panduan dalam pembentukan tamadun sejagat yang dihiasi ilmu dan hikmah, akhlak dan kemanusiaan serta berfungsi ke arah kesejahteraan sejagat.

SINOPSIS BUKU




Yahya Ibrahim: Ikon Pendidikan Negara
Tanjung Malim, Perak:
Penerbit UPSI, 2017.
153ms.

ISBN 978-967-0924-94-6

Sebuah penulisan yang menghimpunkan sebahagian daripada pengalaman kisah suka duka Tan Sri Dato' Seri Dr. Yahaya Ibrahim yang pernah bergelar sebagai guru, pentadbir, pengurus, pemikir dan juga sebagai Pro-Canselor universiti. Seorang tokoh pemikir berjaya yang merancang dan membangunkan pendidikan swasta negara. Malahan turut terlibat sebagai peneraju beberapa buah Institusi Pendidikan Tinggi Awam dan Swasta. Kecemerlangan beliau dalam mengurus dan menggerakkan pembangunan pendidikan swasta berteraskan pengalamannya yang dicorak oleh jiwa halusnya seorang pencinta ilmu, sukakan kebaikan dan cakna terhadap keperluan dalam menyediakan peluang pendidikan kepada semua lapisan masyarakat. Sering menggunakan kekuatan akademik yang dimilikinya, pengalaman pentadbiran serta keluasan jaringan antarabangsa untuk membangunkan pendidikan negara khususnya dengan negara Jerman, United Kingdom dan Amerika Syarikat. Atas komitmen dan sumbangan yang jitu terhadap kemajuan pendidikan negara, maka beliau disohor sebagai 'ikon pendidikan negara'.

Sari Pustaka


SINOPSIS BUKU



SHAFIQ SHAFIE
**I'm A backpacker:
Turkey**
Selangor: Puteh Press,
2017. 235ms.
ISBN 978-967-369

Turki merupakan sebuah negara yang sangat menarik untuk dilawati kerana nilai sejarah dan budayanya yang unik dan berbeza dari negara lain. Penduduk, sejarah, dan bahasa adalah sisi yang membuatkan kita tertarik dan merasa dekat dengannya, namun pada masa yang sama boleh menimbulkan rasa kagum. Negara Turki terdiri daripada 81 buah negeri dan kita harus memilih negeri mana yang perlu dikunjungi bagi menelusuri nilai-nilai sejarah yang ada. Selain itu, sebagai sebuah negara Islam, amat mudah untuk mendapatkan makanan halal, namun sebagai seorang pelancong, kita harus pandai memilih makanan yang wajib dicuba. Buku ini juga menyediakan maklumat berkaitan tempat penginapan yang sesuai untuk pelancong Malaysia. Gambar dan rajah turut disediakan bagi meningkatkan kefahaman pembaca.

SINOPSIS BUKU



Macam-Macam Petua

Selangor: Grup Buku Karangkraf Sdn. Bhd.,
2017. 229ms.

ISBN 978-967-86-0821-3

Buku ini mengumpulkan pelbagai petua lama yang masih kekal relevan untuk dimanfaatkan sehingga kini dari hujung rambut ke hujung kaki, dari ceruk dapur ke laman rumah. Meskipun ianya masih tidak lapuk dek zaman dan masih sesuai digunakan sehingga ke hari ini. Di antara petuanya termasuk petua merangkumi petua kecantikan, kesihatan, kebersihan dan penyimpanan makanan. Semua petua ini menggunakan bahan-bahan semulajadi yang selamat untuk digunakan. Petua-petua ini sesuai untuk digunakan dari dewasa hingga ke peringkat bayi. Selain itu, buku ini turut mengandungi petua bonus seperti untuk menurunkan berat badan dengan berkesan, membuat *homemade masker* serta tip anak cergas. Buku ini sesuai untuk yang ingin mendapatkan petua yang kesejahteraan dalam kehidupan.

Sari Pustaka

SINOPSIS BUKU



ADIBAH ABDUL RAHIM,
MARIAM ADAWIAH
DZULKIFLI, ROHAIZA
ROKIS


Apa Salah Pengkid?

Kuala Lumpur: Telaga Biru
Sdn. Bhd., 2017. 96ms.
ISBN 978-967-388-323

Buku ini memaparkan tentang isu dan kewujudan pengkid dalam masyarakat Malaysia pada masa ini. Pengkid merupakan golongan kaum wanita yang menyerupai lelaki dan menganggap diri mereka sebagai penyelamat wanita lain dari golongan lelaki yang tidak bertanggungjawab. Kajian tentang indikator fizikal serta tingkah laku pengkid mampu membuka mata dan menyedarkan masyarakat tentang identiti sebenar seorang pengkid. Faktor-faktor yang menyumbang kepada gejala pengkid turut dibahas agar masyarakat lebih berhati-hati membendung gejala ini. Selain itu, buku ini turut membincangkan gejala pengkid dari perspektif agama, faktor-faktor penyumbang biologikal, psikologi dan sosial serta kaedah pengawalan yang bersesuaian. Buku ini mendedahkan tentang isu pengkid dan memberikan kesedaran kepada orang ramai akan kepentingan membendung gejala ini daripada terus berleluasa di Malaysia.

Sari Pustaka


SINOPSIS BUKU



DATUK DR.AZIZ UJANG &
DR. KADIR ARIFIN
**Kesedaran Generasi Muda
Terhadap Patriotisme dan
Perpaduan**
Tanjong Malim, Perak:
Penerbit Universiti
Pendidikan Sultan Idris,
2017. 110ms.
ISBN: 9789670924847

Patriotisme dan perpaduan adalah dua perkara yang amat penting dan saling berkait antara satu sama lain serta menjadi asas kepada pembinaan negara maju, harmoni dan aman. Ramai yang bimbang apabila patriotisme dan perpaduan nasional generasi muda di Malaysia semakin merosot. Oleh demikian, buku ini memperlihatkan keperluan asas bagi membentuk tahap patriotisme dan perpaduan nasional dalam kalangan generasi muda. Selain itu, buku ini juga cuba mengupas isu kesedaran dan pengetahuan generasi muda tentang isu kemelesetan patriotisme, politik dan konsep gagasan 1Malaysia, disamping mengenal pasti faktor-faktor penyebab berlakunya keadaan ini dari sudut ekonomi, pendidikan, umur dan keselamatan negara. Penilaian terhadap kesedaran patriotisme dan perpaduan dalam kalangan generasi muda memerlukan penelitian yang tuntas dan penulisan buku ini ditulis berdasarkan kepada kajian yang menggunakan pendekatan kuantitatif dan kualitatif.


SINOPSIS BUKU



SUZANA SHAHAR
Petua Pemakanan Untuk Penuaan Sihat
Bangi, Selangor: Penerbit Universiti Kebangsaan Malaysia, 2017. 83ms.
ISBN: 978-967-41249-39

Buku ini menyingkap peralihan demografi warga emas yang semakin meningkat dan juga perubahan pola status pemakanan serta implikasinya terhadap kesihatan warga emas. Konsep penuaan sihat serta petua pemakanannya diungkai daripada bukti saintifik serta penyelidikan tempatan, agar relevan dengan konteks masyarakat masa kini. Penekanan khusus ditekankan bagi saranan penuaan sihat melalui pemakanan sebagaimana berikut: 1)kekalkan berat badan sihat, 2) penuhi keperluan nutrient melalui diet seimbang, 3) penuhi keperluan kalsium dan vitamin D, 4) tingkatkan pengambilan buah-buahan dan sayur-sayuran, 5) ambil protein dan lemak berkualiti, dan 6) amalkan diet penghadan kalori. Hala tuju bidang ini dan saranan pemakanan bagi memperbaiki status pemakanan populasi bagi penuaan sihat bermula dari analisis status pemakanan dan tahap pengambilan makanan sehingga ke bukti saintifik terkini dan pendekatan kontemporari ke arah penuaan sihat dan kesejahteraaan .


SINOPSIS BUKU



JOHARI HAMID
Travelog Kembara Kasih Sayang
Ulu Yam, Selangor:
Kelisakura Production House, 2017. 535ms.
ISBN: 978-967-15277-02

Travelog Kembara Kasih Sayang adalah siri himpunan kembara basikal yang bermula pada tahun 2014 hingga 2017. Dalam kembara basikal ini tercatat pengalaman pahit manis yang berlaku sepanjang pengembalaan itu. Ia sangat baik untuk dikongsi bersama pembaca terutama yang berminat dengan dunia pengembalaan dan kembara berbasikal. Penulis menceritakan segala peristiwa dalam penulisan yang cukup mudah difahami. Gaya penulisan buku ini juga ringkas dan bersahaja. Pembaca dapat merasai sendiri pengalaman penulis seolah-olah terlibat secara langsung dalam kembara tersebut. Antaranya cabaran kayuhan Eropah, 1000 Corners, Pai – Mae Hong Son, Sumatera, Laos, The Golden Triangle, Thailand dan Malaysia. Penulis berkongsi betapa seronoknya mengembala dengan basikal yang merupakan satu pengalaman yang tidak pernah terfikir baginya yang bermula sebaik sahaja bersara daripada jawatan pensyarah universiti.


SINOPSIS BUKU



LYDIA TEH
How I Wrote Ten Books
Petaling Jaya, Selangor:
MPH Group Publishing
Sdn Bhd, 2017. 233ms.
ISBN: 9789674154332

Lydia Teh has written very helpful guide for the would-be published author of non-fiction, especially in the Malaysian context. The book is full of insights drawn from her own experience as the author of nine previous books. She lets the reader in on her own journey to publication, and writes honestly, even about bumps she hit along the road. There is useful advice about how to publicise the book once it is published, and much more. As one of Malaysia's most prolific authors, Lydia has written an honest and uplifting book that shows you the ins outs of writing and getting your own book published. It's an easy-to-read and down-to-earth guide full of interesting anecdotes that will motivate you start working on your own bestseller. Lydia Teh wrote her first book at 39 while expecting her fourth child. She is best known for Honk! If you're Malaysian, which has sold of 30,000 copies since in 2007. This is the chronicle of how she wrote 10 non-fiction books, 6 while managing the home as a homemaker, and the rest while operating an English-language centre. Ignite your passion for writing with this candid and inspiring account of how one ordinary woman did it.


SINOPSIS BUKU



FEDTRI YAHYA
Coconut Shake Satu!
Petaling Jaya: Buku Puris,
2017. 180ms.
ISBN 978-983-09763-89

Era moden dan teknologi telah mendorong manusia menjadi alpa, lalai dan leka. Masa yang ada tidak digunakan dengan sebaiknya, sebaliknya disia-siakan. Penulis yang merupakan salah seorang selebriti turut membantu dalam memberi pencerahan kepada orang-orang yang melampaui batas dan tatasusila agama. Bait-bait bahasa dan kata-kata yang ditulis oleh penulis di dalam buku ini merupakan nasihat dan panduan yang berguna untuk diikuti oleh semua orang. Penulis cuba memberikan contoh dengan mengambil situasi dan peristiwa semasa agar pembaca mudah memahami dan menghayati perkara-perkara kebaikan yang diketengahkan. Pelbagai perkara yang bermanfaat boleh dikutip dari isi kandungan buku ini. Buku ini harus ada dan harus dimiliki oleh setiap orang.

SINOPSIS BUKU




NORDEN MOHAMED
Gilap Hati Agar Tak Gelap: Maaf Cakap.3
Shah Alam: Grup Buku Karangkraf, 2017. 180ms.
ISBN 978-967-86079-88

Sebuah buku motivasi yang mengandungi pengisian sangat menarik. Peringatan dan panduan hidup seharian menjadi topik perbincangan dari buku ini. Penulis mengambil contoh dari perkara yang berlaku di persekitaran dan perkara sehari-hari seperti budaya bersalamans dan bermaafan kerana dikatakan memaafkan orang dan meminta maaf adalah ubat kepada hati. Satu artikel yang menyentuh hati iaitu kenangan penulis mengenai jalur gemilang yang mungkin juga dilalui dan dirasai oleh pembaca. Selain itu, beberapa tips dan nasihat yang dikongsi oleh penulis boleh membantu pembaca dalam menjalani kehidupan harian dengan lebih selesa. Pembaca dari pelbagai lapisan masyarakat perlu memiliki buku ini.

Sari Pustaka

SINOPSIS BUKU



DATO' SITI NOR BAHYAH MAHAMOOD,
DATO' HAJI MUHAMMAD ZAKARIA &
UMMU SAKINAH
MUHAMMAD


Amalan Ibu Mengandung:
Panduan Kehamilan
Melalui Ibadah Gaya Hidup
Dan
Pemakanan Sihat

Kuala Lumpur: Telaga Biru
Sdn Bhd, 2017. 223ms.
ISBN 978-967-38828-85

Islam amat memberi kemuliaan kepada kaum ibu berbanding bapa. Walau bagaimanapun, bapa juga wajib dimuliakan oleh anak-anak kerana bapa merupakan ketua keluarga dan juga memainkan peranan yang penting kepada sesebuah keluarga. Ibu dan bapa perlu memiliki ilmu pengetahuan dari awal perkahwinan sehingga seterusnya selagi hayat masih ada. Seorang ibu dan bapa perlu mempunyai pengetahuan mengenai kehamilan, walaupun bapa tidak melalui proses kehamilan dan melahirkan anak. Isi kandungan buku amat bermanfaat dengan disokong oleh ayat-ayat al-Quran, hadis dan doa sebagai amalan. Pelbagai tips dan ilmu disusun dangan baik oleh penulis untuk pembaca memanfaatkan demi kesejahteraan hidup.

Sari Pustaka

SINOPSIS BUKU



Empat negara iaitu Syria, Lubnan, Jordan dan Palestin merupakan negara asal yang dikenali sebagai Negara Syam. Walau bagaimanapun, ramai yang tidak mengetahui akan fakta tersebut, dan faktor-faktor yang menyebabkan wilayah itu berpecah menjadi empat buah negara. Pengisahan sejarah dan perkembangan wilayah Syam dikupas oleh penulis melalui tulisan ini. Ini kerana kisah negara Syam disebutkan di dalam al-Quran oleh Allah S.W.T. untuk dijadikan panduan dan iktibar oleh seluruh umat Islam. Kegemilangan dan kejatuhan serta pelbagai kisah yang menarik turut dicatatkan untuk kita hayati kisah di sebalik peristiwa tersebut.

ANWAR MAJDI ASHAN
Syam Negara Misteri Akhir Zaman: Pengembaran Hebat Negara Misteri
Kuala Lumpur: Telaga Biru Sdn Bhd, 2017. 196ms.
ISBN 978-967-38828-16

SINOPSIS BUKU



MOHAMMAD YUSRI
YUBHI MD YUSOFF
Warna-Warna Kehidupan:
Suatu Coretan
Pengalaman Dan Luahan
Kuala Lumpur: Telaga Biru
Sdn Bhd, 2016. 314ms.
ISBN 978-967-38826-56

Setiap detik kehidupan di dunia ini dilalui dengan pelbagai ujian, dan atas individu itu sendiri untuk menanganinya dan mencari jalan penyelesaian. Oleh itu, penulis telah berkongsi ilmu dan pengetahuan serta pengalaman untuk pembaca buku ini. Penulis memberi pencerahan dalam pelbagai permasalahan dan jalan penyelesaian melalui buku beliau bermula dari cara membina syurga idaman sehingga kepada membina kepercayaan dalam kehidupan dan diri sendiri. Misalnya kehidupan berumahtangga akan melalui pasang surutnya yang akan dilalui oleh pasangan suami isteri ini amat sesuai untuk dibaca dan dijadikan panduan bagi tips, nasihat dan contoh-contoh yang dikongsi oleh penulis banyak berkaitan dengan isu semasa yang biasa berlaku di sekeliling kita.

Sari Pustaka

SINOPSIS BUKU



SAYYID SADIQ ABDUL
FATTAH
My Mother My Paradise :
Puchong, Selangor:
Pustaka Ibnu Katsir, 2017.
392ms.
ISBN 978-967-10756-8-5

Buku ini menerangkan pelbagai aspek dalam kehidupan seorang ibu. Terdapat sembilan bab yang dijelaskan dalam buku ini berkaitan tajuk ini. Aspek yang dibincangkan termasuk kedudukan seorang ibu dalam al-Quran, cara-cara bagaimana berbakti kepada ibu, pentingnya berbakti kepada ibu yang boleh menebus dosa besar serta mengenai dahsyatnya doa ibu. Seterusnya kita diingatkan mengenai doa ibu yang akan memberikan kebahagiaan di dunia dan akhirat sebagaimana yang tercatat di dalam sejarah Islam. Bab ketujuh dan seterusnya menceritakan kisah mengenai ibu-ibu luar biasa dalam al-Quran, kisah al-Quran tentang anak yang berbakti dan terakhir adalah mengenai kisah seribu hikmah dalam kisah al-Quran. Buku ini sesuai dijadikan bacaan bagi semua golongan agar lebih menghargai kasih seorang ibu.

SINOPSIS BUKU




**Kebudayaan
Kebangsaan Dicabar**
Kuala Lumpur: Dewan
Bahasa dan Pustaka,
2017. 149ms.
ISBN 978-983-1010-4

Buku ini menghimpunkan ese-i-esei yang membincangkan isu dan persoalan mutakhir berkenaan bahasa, sastera dan kebudayaan kebangsaan. Ese-i-esei yang terpilih dalam buku ini telah dibahaskan dalam Pertemuan Angin Timur Laut yang berlangsung pada 2-4 April 2004 di Jabatan Kebudayaan dan Kesenian Negeri Pahang. Dasar Kebudayaan Kebangsaan bukan untuk dikompromi lagi. Cabaran demi cabaran dilihat sebagai mampu meruntuhkan tekad dan aku janji yang telah semua orang sedia maklum. Tindakan yang lemah, pemikiran yang tidak jelas, dan dasar-dasar yang proliberalisasi didapati tidak menguntungkan masyarakat Malaysia. Kemajuan kebendaan dan pembangunan fizikal yang tidak seimbang dengan pembangunan tamadun pemikiran bangsa akan merencatkan jati diri yang semakin jelas terhakis dan tewas dalam persaingan antarabangsa kerana gagal membentuk keperibadian sendiri.

Sari Pustaka

SINOPSIS BUKU



MUHAMMAD ABDULLAH
AL-AMIN

**Golden Rule : untuk
kebahagiaan suami isteri**

Petaling Jaya, Selangor:
Galeri Ilmu Sdn. Bhd., 2017.


212ms.

ISBN 978-983-097-7

Buku ini membincangkan asas dalam pembentukan rumah tangga yang sejahtera. Walaupun mungkin ada antaranya dianggap remeh, jangan lupa bahawa dalam keremehan itulah tersedia ganjaran pahala yang besar. Masalah rumah tangga tidak sekadar perlukan kesabaran, tetapi juga ilmu serta kebijaksanaan. Barulah masalah yang timbul itu akan menjadi baja yang akan menyuburkan lagi cinta dan kasih sayang suami isteri. Setiap pasangan boleh menangani masalah rumah tangga serta memelihara keharmonian keluarga, dengan memahami seni-seni dalam mengekalkan kasih sayang suami isteri. Buku ini juga mengandungi tip-tip yang mahal dan realistik dalam membentuk keluarga bahagia berlandaskan Islam dan teladan keluarga Nabi SAW.

Sari Pustaka

SINOPSIS BUKU




KHAIRUNNISA HAMZAH
Supermama : Ligat Cekap Hebat
Kuala Lumpur : Telaga Biru
Sdn. Bhd., 2016. 199ms.
ISBN 978-967-388-258-8

Menjadi suri rumah bukanlah perkara mudah. Bagaimana mahu mengurus rumah agar selesa dan kemas dalam masa yang singkat. Oleh itu, ilmu mengenai pengurusan rumah tangga wajar dipelajari oleh seorang suri rumah supaya rumah tangga dapat diurus dengan bijak dan segala keperluan rumah tidak terabai. Dalam buku ini, akan dikongsikan tentang tip dan panduan untuk seorang suri rumah yang menjalani kehidupan sepenuh masa di rumah agar menjadi seorang suri yang profesional. Tidak kalut, mudah dan mahir tentang pengurusan rumah, masa, wang dan anak-anak, demi menjaga kepentingan rumah tangga dan kebahagiaan keluarga. Buku ini dihasilkan melalui pengalaman penulis sendiri yang menjadi seorang suri sepenuh masa di rumah. Tip dan petua yang dibentangkan adalah praktikal dan pastinya memnberi manfaat kepada pembaca.

Sari Pustaka


SINOPSIS BUKU



SHAMSUDDIN KADIR,
AIN MUHAMMAD
Cash Flow untuk wanita
Petaling Jaya: Selangor:
Galeri Ilmu Sdn. Bhd.,
2017. 118ms.
ISBN 978-983-097-654-9

Buku ini banyak menyalurkan idea untuk para wanita khususnya mengurus kewangan secara berhemah dan bijaksana. Karya ini merupakan satu garapan santai gabungan dua penulis berlainan jantina yang boleh dijadikan panduan kepada para wanita dalam merancang perbelanjaan dan mengutamakan keperluan berbanding kehendak. Sebagai manusia biasa adakalanya kita menyedari kekhilafan dalam berbelanja dengan mendahului kehendak berbanding keperluan, tetapi dambaun pujian dan kebanggaan diri membutakan kita dalam menangani situasi sebegini. Justeru, kehadiran buku ini umpama satu magnet yang boleh menarik kita ke arah kebaikan dengan mendahului keperluan dan menitikberatkan soal perbelanjaan di luar jangka atau perlunya satu tabungan khusus untuk menangani situasi kecemasan yang boleh berlaku kepada sesiapa sahaja tanpa mengira waktu.

SINOPSIS BUKU




ESRA OZYUREK
Kekal Jerman menjadi Muslim

Petaling Jaya: Selangor: ZI Publications Sdn. Bhd.,
2017. 272ms.
ISBN 978-967-5266-40-9

Penulis mengajak kita untuk berfikir dan merenung semula bagaimana begitu sukar agama Islam menyusup masuk untuk bertapak di bumi Jerman yang dikenali sebagai negara sekularisme dan sebat dengan nilai Eropahnya. Melalui buku ini penulis cuba berkongsi dilema yang dihadapi oleh muslim Jerman dalam menyesuaikan agama Islam dengan budaya Jerman yang jelas menolak Islam kerana bertentangan dengan identiti masyarakat di sana. Stigma masyarakat Jerman terus mempengaruhi fikrah mereka dengan melabelkan muslim Jerman hanyalah imigran bukan kulit putih. Selain itu, penyebaran Islam di Jerman juga membangkitkan keresahan di kalangan masyarakat bukan Muslim kerana khuatir Jerman akan ditawar oleh Muslim kerana ianya berlaku tanpa paksaan dan tiada agenda tersembunyi yang menjadi kebiasaan bagi pengaruh agama lain yang berpaksikan politik, budaya dan tamadun sebagaimana tradisi yang wujud dalam masyarakat Jerman.

SINOPSIS BUKU



DR. MOHAMMAD NIDZAM
BIN ABDUL KADIR
Adat vs Ibadat
Kuala Lumpur: Telaga Biru
Sdn. Bhd., 2016. 240ms.
ISBN 978-967-388-263-2

Buku ini mengajak kita untuk berlapang dada dan berbaik sangka sebelum sesuatu amalan atau perbuatan itu dibuktikan benar atau sebaliknya berdalilkan Al-Quran dan Al-Sunnah. Masyarakat hari ini sangat pantas menjatuhkan hukum dalam hal amal ibadat individu atau masyarakat yang tidak sekufu atau sealiran dengannya walhal kemungkinan amalan yang dilakukannya juga merupakan satu bidaah yang diwarisi turun temurun yang tidak bersumberkan dalil dan syarak. Isu yang pada mulanya dianggap remeh ini telah menjadi barah dalam masyarakat hari ini sehingga terjadinya perselisihan dan perbalahan yang menyebabkan pertengkaran yang tidak berkesudahan serta mencetuskan fenomena kepuakan yang boleh meruntuhkan kesatuan umat Islam. Justeru, kehadiran buku ini di pasaran kalaupun tidak menyelesaikan isu ini sepenuhnya, sekurang-kurangnya menjadi wasilah kepada masyarakat untuk memahami letak duduk sesuatu perkara dalam konteks Islam yang sebenar tanpa menyinggung perasaan orang lain dan mewujudkan suasana harmoni bersandarkan manhaj Ahli Sunnah Wal Jamaah.